

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Inatsisartut upernaakkut 2022-mi ataatsimiinnermi suliffissarsiortunut ikiorsiissutit pillugit Inatsisartut inatsisaat (immikkoortoq 23) aamma pisortanit ikiorsiissutit pillugit Inatsisartut inatsisaat (immikkoortoq 24) akuersissutigaa. Inatsisartut inatsisaat marluk atortuulersinneqartussaagaluarpuk ulloq 1. januar 2023. Taamaattoq ataatsimoortumik tapiissutit pillugit isumaqatiginninniarnermi kommuniniit kissaateqarnerup kingorna 2022-mi ukiakkut ataatsimiinnermi siunnersuutit (immikkoortoq 183) atortuulerfissaat 1. juli 2023-imut kinguartinneqarpoq.

Upernaakkut 2023-imi ataatsimiinnermi maannakkut ingerlanneqartumi meeqqanut tapiissutit pillugit Inatsisartut inatsisaannik, utoqqalinersiaqarneq pillugu Inatsisartut inatsisaannik, siusinaartumik pensionisiat pillugit Inatsisartut inatsisaannik, ilinniartunut tapiisarneq pillugu Inatsisartut inatsisaannik aamma ilinniagaqarnerisuteqarneq pillugu Inatsisartut inatsisaannik allannguinnissamut Inatsisartut inatsisissaattut siunnersuummik (imm. 45) Naalakkersuisut saqqummiussippuk.

Naalakkersuisut aalajangerput oqimaqatigiinnerup allaanerusup ujartorneqarnissaa siunertaralugu siunnersuut tunuartinneqassasoq tamatumalu kingorna UKA2023-mi imaluunniit UPA2024-mi siunnersuut iluarsagaq saqqummiunniarlugu.

Tamannali ima kinguneqarpoq, inuit meerallit ullumikkut pisortanit ikiorsiissutinik pisartagaqartut, pisortanit ikiorsiissutit aamma suliffissarsiortunut ikiorsiissutit pillugit inatsisit nutaat ulloq 1. juli 2023-mi atuutilerpata, isertitaat malunnaatilimmik appassasut, naliliineq tunngavigalugu ikiorsiissuteqarnermut ilaasoq meeqqanut tapit tunniunneqarnissaannut periarfissaq atorunnaassammat, meeqqanullu tapiissutinik qaffasinnerusunit taarserneqarnani.

Pisortanit ikiorsiissutinik aaqqissuusseqqinnermi ikiorsiissutit allanngortinneqarput, taamaalilluni siunissami pisortanit ikiorsiissutit annertussusilerikkani ikiorsiissutinngorlugit. Ikiorsiiissutit pisariillisillugit ilusiliineq IT-mik atortulersuutinik nutaanik ineriartortitsineq peqatigalugu kommuninut allaffissornikkut sulineq oqilisaaffigissavaat. Taamaattoq suli nalorniarpoq, IT-mik aaqqissuusat pisariaqartut aallartisarnerat naammannersoq, ilaatigut paasinarsimmat naatsorsuutigisamit immikkoortunik piumasaqaatit sularinissaat, sularinnittussarsiuussinerit, kiisalu piareersarnerit pisariaqartut tamatuminngalu atortussanngortitsinissaq pisariusut.

Ilaqtariit meerartallit, pilersuisup imaluunniit pilersuisut marluullutik pisortanit ikiorsiissutinik imaluunniit suliffissarsiortunut ikiorsiissutinik pisartagaqartillugit, meeqqanut

tapiissutit pillugit siunnersuutip kinguartinneqarneranik eqqugaannginnissaat qulakkeerniarlugu aamma kommunit IT-mik atortulersuutit pisariaqartut pissarsiarinissaat eqqarsaatigalugit Naalakkersuisut naleqqunnerpaatut isumaqarput, pisortanit ikiorsiissutit aamma suliffissarsiortunut ikiorsiissutit atuutilertinnissaannut ullui kinguartinneqassasut meeqqanut tapiissutit pillugit siunnersuut saqqummiunneqarnissaata aamma IT-mik atortulersuutit pisariaqartut naammassinissaata tungaannut.

Naalakkersuisut tamanna tunngavigalugu Inatsisartut inatsisissaattut siunnersuut manna suliaraat aamma pisortanut ikiorsiissutit pillugit Inatsisartut inatsisissaattut aamma suliffissarsiortunut ikiorsiissutit pillugit Inatsisartut inatsisissaattut siunnersuutip matuma atuutitsinneqalernissaata kinguartinneqarnissaa pillugu kingusinaartumik nalunaarutigineqarneranut immikkut akuersissut pillugu Inatsisartuni Siulittaasoqarfimmut qinnutigalugu.

2. Siunnersuummi immikkoortut pingaernerit

Pisortanit ikiorsiissutit pillugit Inatsisartut inatsisissap atuutilernissaanut ullua siunnersuummi allangortinneqarpoq. Atuutilernissaanut ullua imatut allangortinneqarpoq, inatsit nalunaarutikkut atuutilersinneqassalluni. Naalakkersuisut naatsorsuutigaat meeqqanut tapiissutit pillugit siunnersuut aamma IT-mik aaqqissuussaq nutaaq piareeqqassasut, taamaasilluni inatsisit ulloq 1. januar 2024-mi imaluunniit 1. juli 2024-mi atuutilersinneqarsinnaallutik.

Tamatuma saniatigut suliffissarsiortunut ikiorsiissutit pillugit Inatsisartut inatsisissap atuutilernissaanut ullua allangortinneqarpoq, taamaalillutik Inatsisartut inatsisaat ataatsikkut atuutilersinnaallutik.

3. Pisortanut aningaasaqarnikkut allaffissornikkullu kingunerisassai

Inatsisit nalunaarutikkut ulloq 1. januar 2024-mi atuutilersinneqarpata, taamaalillunilu atuutilerfiata ullua ukiup affaanik kinguartinneqarpat, 1. juli 2023-miit 1. januar 2024-mut, Nunatta Karsia 8,5 mio. kr-inik sipaaruteqassaaq.

Tassunga pissutaavoq pisortanit ikiorsiissutit pillugit siunnersuut ukiumut aningaasartuutit katillugit 11 mio. kr-iummata. Atuutilerfissatut ullua ukiup affaanik kinguartinneqarpat, 5,5 mio. kr-inik tamanna sipaaruteqarnermik kinguneqassaaq.

Tamatuma saniatigut kommuninut allaffissornikkut sipaaruteqarnek annertussusileriikkanik akigititat atorlugit ikiorsiisarnermut ikaarsaanermi, IT aaqqissuussamik ingerlanneqarsinnaasut, aatsaat ulloq 1. januar 2024 aallarnerfigalugu sunniuteqalertussaavoq, tamassumalu kingunerisavaa, Nunatta Karsiata 3 mio. kr-inik annertunerusumik sipaaruteqarsinnaanera.

Inatsit ulloq 1. juli 2024-mi nalunaarutikkut atuutilersinneqarpat, Nunatta Karsia 2024-p ukiup affaa siulleg 5,7 mio. kr-inik annertunerusumik sipaaruteqassaaq. (akinut akissarsianullu nalimmassarlugu 5,5 mio. kr-it).

4. Inuussutissarsiortunut aningaasaqarnikkut allaffissornikkullu kingunerisassai

Inuussutissarsiortunut aningaasaqarnikkut allaffissornikkullu kinguneqassangilaq.

5. Avatangiisinut, pinngortitamut aamma inuiaqatigiit peqqissusaannut kingunerisassai

Avatangiisinut, pinngortitamut aamma inuiaqatigiit peqqissusaannut kingunerisassaanik soqanngilaq.

6. Innuttaasunut kingunerisassai

Siunnersuutip kingunerissavaa, ullumikkut inuit pisortanit ikiorsiissutit pillugit Inatsisartut inatsisaat malillugu ikiorsiissutinik pisartagaqarnissamut pisinnaatitaasut malittarisassat atuuttut malillugit pisartagaqarnerat ingerlaannassasoq aamma pisortanit ikiorsiissutit imaluunniit suliffissarsiortunut ikiorsiissutit pillugit inatsisit nutaat atuutilerpata, pisortanit ikiorsiissutit aamma suliffissarsiortunut ikiorsiissutit pillugit malittarisassanut nutaanut ikaarsaassallutik.

7. Pingaaruteqartunut allanut kingunerisassai

Siunnersuut pingaaruteqartunut allanut kingunerisassaanik soqassanngitsoq naatsorsuutigineqarpoq.

8. Tusarniaaneq

Siunnersuut tusarniaassutigineqanngilaq, siunnersuummi Inatsisartut inatsisaasa marluk atortuulersinnissaannut ulluisa allannguutaat kisimik pineqarmata imarisaanillu allannguinermik kinguneqanngimmata.

Siunnersuummi aalajangersakkat ataasiakkaat pillugit oqaaseqaatit*§ 1-mut*

Nr. 1-imut

Aalajangersakkap aalajangersarpaa, pisortanit ikiorsiissutit pillugit Inatsisartut inatsisaat nalunaarutikkut ulloq 1. januar imaluunniit 1. juli atuutilersinneqarsinnaasoq.

Oqaaseqaatini nalinginnaasuni immikkoortoq 2-mi allaaserineqartutut Inatsisartut inatsisaat ulloq 1. januar 2024-mi imaluunniit 1. juli 2024-mi atuutilersinneqarsinnaasoq naatsorsuutigineqarpoq.

Nr. 2-mut

Imm. 1-imut

Pisortanit ikiorsiissutinik naliliineq aallaavigalugu siumoortumik pisartagaqarnermiit pisortanit ikiorsiissutinik annertussusileriikkanik kingumoortumik pisartagaqarnermut ikaarsaarnermi pisortanit ikiorsiissutinik pisartagaqartoq qaammat ataaseq aningaasaateqassanngilaq. Aalajangersakkap aalajangersarpaa, Inatsisartut inatsisaata ulloq atuutilerfiani ikiorsiissutit annertussusileriikkat qaammatip affaanut tunniunneqartartut amerlaqataanik, tunngaviusumik akigititatut aamma iliuusissatut pilersaarummut tapitut, siumoortumik ikiorsiissutinik annertussusileriikkanik immikkut tunniussisoqassasoq.

Imm. 2-mut

Aalajangersakkap aalajangersarpaa, Inatsisartut inatsisaata atuutilerfiata kingorna ullut 15-it qaangiuppata pisortanit ikiorsiissutit annertussusileriikkat qaammatip affaanut tunniunneqartartut amerlaqataanik, tunngaviusumik akigititatut aamma iliuusissatut pilersaarummut tapitut, siumoortumik ikiorsiissutinik annertussusileriikkanik immikkut tunniussisoqassasoq.

Imm. 3-mut

Ikiorsiissutit annertussusileriikkat, tak. imm. 2 aamma 3, tunngaviusumik akigititaqarput, tak. § 22, imm. 1-imiit 3-mut, aamma tapeqarsinnaallutik, tak. § 24. Aningaasarsiat tunngavigalugit ilanngaasoqassanngilaq, tak. §§-it 25 aamma 26. Inunnut angerlarsimaffiup avataani pisortat aningaasartuutaasunik akiliiffigisartagaani sivisunerusumik najugaqartunut, ilanngaanneqartassapput, tak. § 27.

§ 2-mut

Nr. 1-imut

Aalajangersakkap aalajangersarpaa, suliffissarsiortunut ikiorsiissutit pillugit Inatsisartut inatsisaat nalunaarutikkut ulloq 1. januar imaluunniit 1. juli atuutilersinneqarsinnaasoq. Oqaaseqaatini nalinginnaasuni immikkoortoq 2-mi allaaserineqartutut Inatsisartut inatsisaat

ulloq 1. januar 2024-mi imaluunniit 1. juli 2024-mi atuutilersinneqarsinnaasoq
naatsorsuutigineqarpoq.

§ 3-mut

Aalajangersakkap aalajangersarpaa, Inatsisartut inatsisaata saqqummiunneqarnerata aqaguani
Inatsisartut inatsisaat atuutilersinneqassasoq.

Ilanngussaq 1

Inatsisissatut siunnersuut inatsimmut atuuttumut naleqqiullugu	
<i>Oqaasetai atuuttut</i>	<i>Inatsisissatut siunnersuut</i>
	§ 1 Pisortanit ikiorsiissutit pillugit Inatsisartut inatsisaat nr. 6, 20. juni 2022-meersoq, Inatsisartut inatsisaatigut nr. 25, 25. november 2022-meersukkut allanngortinneqartoq imatut allanngortinneqassaaq:
” § 57. Inatsisartut inatsisaat ullormi 1. juli 2023 atuutilissaaq.”	1. § 57, imm. 1, ima oqaasertalerneqassaaq: ”Inatsisartut inatsisaat nalunaarutikkut atuutilissaaq ulloq 1. januar imaluunniit 1. juli.”
” § 59. Ullormi 1. juli 2023 qaammatip affaanut siumoortumik ikiorsiissutinik annertussusileriikkanik tunniussisoqassaaq. <i>Imm. 2.</i> Ullormi 15. juli 2023 qaammatip affaanut siumoortumik ikiorsiissutinik annertussusileriikkanik tunniussisoqassaaq. <i>Imm. 3.</i> Ikiorsiissutit annertussusileriikkat 2023-mi julip qaammataani tunngaviusumik akigititaq atorlugu tunniunneqassapput, tak. § 22 aamma iliuusissatut pilersaarummut tapeq, tak. § 24 aamma aningaasarsianut ilannga at ilanngunnagu, tak. § 25 aamma 26. § 27 assigisaanik atortinneqassaaq.”	2. § 59 ima oqaasertalerneqassaaq: ” § 59. Inatsisartut inatsisaata ullormi atuutilerfiani qaammatip affaanut siumoortumik annertussusileriikkanik ikiorsiissutinik tunniussisoqassaaq. <i>Imm. 2.</i> Inatsisartut inatsisaata atuutilerfiata kingorna ullut 15-it qaangiunneranni qaammatip affaanut siumoortumik annertussusileriikkanik ikiorsiissutinik tunniussisoqassaaq. <i>Imm. 3.</i> Ikiorsiissutit annertussusileriikkat, tak. imm. 2 aamma imm. 3, tunngaviusumik akigititaq atorlugu tunniunneqassapput, tak. § 22, aamma iliuusissatut pilersaarummut tapeq, tak. § 24, aamma aningaasarsianut ilannga at ilanngunnagu, tak. § 25-26. § 27 assigisaanik atortinneqassaaq.”
	§ 2 Suliffissarsiortunut ikiorsiissutit pillugit Inatsisartut inatsisaat nr. 7, 20. juni 2022-meersoq, Inatsisartut inatsisaatigut nr. 25, 25. november 2022-meersukkut allanngortinneqartoq, imatut allanngortinneqassaaq:
” § 34. Inatsisartut inatsisaat una	1. § 34, imm. 1, ima oqaasertalerneqassaaq:

atortuulerpoq ulloq 1. juli 2023.”	”Inatsisartut inatsisaat una atortuulerpoq ulloq 1. januar imaluunniit 1. juli.”
	<p style="text-align: center;">§ 3</p> Inatsisartut inatsisaat saqqummiunneqarnerata aqaguani atortuulersinneqassaaq.